

Àcua, pro is impreos potàbiles, agrìculos e industriales assignados 720 millones de metros cubos



S'Assessore Saiu: "Garantidas is provistas. in Sardigna sistema de regorta adequadu, ma serbint interventos in is retes de distributzione"

In totu sunt 720 millones de metros cubos is volùmenes de àcua assignados in bia definitiva pro su 2023 a is impreos potàbiles, agrìculos e industriales de totu sa Sardigna. Dd'at istabilidu su Comitadu istituzionale de

s'Autoridade de Batzinu durante sa mesa chi s'est riunidu eris.

"Sa provista idropotàbile e cussa industriale sunt garantidas. Is volùmenes disponìbiles pro is impitos potàbiles de invasos gestidos dae s'Ente Abbas de sa Sardigna (Enas) est de belle 206 millones de metros cubos, a custis si depent agiùnghere is 12,9 millones de metros cubos bènnidos de is àteros invasos. Pro is impitos industriales is volùmenes disponìbiles pro su 2023 sunt imbetzes de 22 millones e 280.000 metros cubos", deccarat s'assessore regionale de is Traballos Pùblicos Pierluigi Saiu, chi subra de su tema de s'àcua est intervènnidu in su cunvegnu 'Su cambiamentu climàticu e is cunseguèntzias in s'amparu de sa risorsa idrica: cales solutzione?', promòvidu dae s'Egas.

"Craru sa cuota prus rilevante assignada est cudda programada in favore de sa massaria, cun 479 millones de metros cubos. Su datu est in manera sustantziale in linia cun su de s'annu coladu, cun un'assegnazione cumplessiva unu pagu inferiore, uguale a 11,36 millones de metros cubos de mancu, ma chi in realidade si reduit a 7,36 millones de metros cubos in virtude de su fatu chi is cunsòrtzios de bonìfica de Aristanis e de sa Sardigna Meridionale ant espressadu una provista cumplessiva inferiore de 4 millones de metros cubos respetu a s'annu pretzedente".

"In manera cumplessiva faghet a nàrrere chi su sistema de gestione de s'àcua in Sardigna si cunfirmat adequadu a is provistas chi devet satisfàghere suta de su profilu de sa regorta de s'àcua e de s'assegnazione sua. Si rivelat però una mancàntzia suta de su profilu de sa distributzione de s'àcua chi si perdet in is cundutas istampafas e pro custa resone chi s'atzione de su governu regionale e de is entes interessados at a èssere orientada a programare interventos noos e a isblocare cuddos galu firmos, a manera de reduire is isprecos ", concruit s'assessore Saiu.